

News Unit**Date: 11-01-2026****Time: 7-35 A.M.****DEO: KB****Desk in Charge :- SDG****Compiling : Indranil M./ PPM****NRT : Partha Pratim M.****Announcement :-** আকাশবাণী / -খবর পড়ছিঃবিশেষ বিশেষ খবরঃ-

- ১/ ভোটের তালিকার বিশেষ নিবিড় সংশোধনী তদারকির জন্য আরো চারজন বিশেষ রোল অবজারভার নিয়োগ করেছে নির্বাচন কমিশন।
- ২/ SIR প্রক্রিয়ায় যুক্ত মাইক্রো অবজারভারদের একাংশের বিরুদ্ধে কাজে গাফিলতির অভিযোগ ওঠায়, কমিশন ফের একবার কঠোর বার্তা দিয়েছে।
- ৩/ কয়লা পাচার কাণ্ডের তদন্তে কলকাতায় তল্লাশির সময় কি ঘটেছিল, তা বিস্তারিত জানিয়ে কলকাতার এনফোর্সমেন্ট ডিরেক্টরেট, দিল্লিতে সংস্থার সদর দপ্তরে রিপোর্ট জমা দিয়েছে।
একইসঙ্গে সুপ্রিম কোর্টে মামলা দায়ের করেছে তারা।
তল্লাশি চলাকালীন কেন্দ্রীয় তদন্তকারী সংস্থার কাছ থেকে নথি ছিনিয়ে নেওয়ায় মুখ্যমন্ত্রীর সমালোচনা করেছে।
- ৪/ পশ্চিম মেদিনীপুরের চন্দ্রকোনা রোডে রাজ্যের বিরোধী দলনেতা শুভেন্দু অধিকারীর গাড়িতে হামলার অভিযোগ উঠেছে।
- ৫/ তীব্র শীতের প্রকোপ উপেক্ষা করেই গঙ্গাসাগর মেলায় আজ ভোর থেকে শুরু হয়েছে নানা অনুষ্ঠান।
- ৬/ মেয়েদের অনূর্ধ্ব-১৫ একদিনের ক্রিকেটের কোয়ার্টার ফাইনালে উঠেছে বাংলা।
- ৭/ রাজ্যে শীতের প্রকোপ থাকলেও কলকাতায় আজ বেশ কয়েকদিন পর সর্বনিম্ন তাপমাত্রা স্বাভাবিকের উপরে।

পশ্চিমবঙ্গের ভোটার তালিকার বিশেষ নিবিড় সংশোধনী তদারকির জন্য আরো চারজন বিশেষ রোল অবজারভার নিয়োগ করল নির্বাচন কমিশন। কমিশন গতকাল প্রতিবেশী রাজ্য ও দিল্লিতে কেন্দ্রীয় সরকারের বিভিন্ন দপ্তরে কর্মরত IAS আধিকারিককে পশ্চিমবঙ্গে বিশেষ রোল অবজারভার হিসেবে দায়িত্ব দেওয়ার কথা জানিয়েছে। বিশেষ রোল অবজারভার হিসেবে যাঁদের নিয়োগ করা হয়েছে, তাঁরা হলেন যুব বিষয়ক ও ক্রীড়া মন্ত্রকের ডিরেক্টর সন্দীপ রেওয়াজি রাঠোর, ত্রিপুরার জনগণনা অধিকর্তা রতন বিশ্বাস, জাতীয় স্বাস্থ্য কর্তৃপক্ষের ডেপুটি সেক্রেটারি ড. শৈলেশ ও সামাজিক ন্যায় ও ক্ষমতায়ন মন্ত্রকের ডিরেক্টর বিকাশ সিং।

নির্বাচন কমিশনের নির্দেশ অনুযায়ী, বিশেষ নিবিড় সংশোধনী প্রক্রিয়ায় কোনো যোগ্য ভোটার যেন তালিকা থেকে বাদ না পড়েন এবং কোনও অযোগ্য ব্যক্তির নাম যেন তালিকায় না থাকে, তা নিশ্চিত করাই এই অবজারভারদের মূল দায়িত্ব। তাঁরা পশ্চিমবঙ্গের মুখ্য নির্বাচনী আধিকারিকের দফতর থেকে দাবিদাওয়া ও আপত্তি নিষ্পত্তির পাশাপাশি চূড়ান্ত ভোটার তালিকা প্রকাশ পর্যন্ত পুরো প্রক্রিয়া নজরদারি করবেন বলে নির্দেশে জানানো হয়েছে।

SIR প্রক্রিয়ায় যুক্ত মাইক্রো অবজারভারদের একাংশের বিরুদ্ধে কাজে গাফিলতির অভিযোগ ওঠায়, নির্বাচন কমিশন ফের একবার কঠোর বার্তা দিয়েছে। রাজ্যের মুখ্য নির্বাচনী আধিকারিকের দফতরের জারি করা নির্দেশিকায় বলা হয়েছে, দায়িত্ব পালনে গাফিলতি কোনভাবেই বরদাস্ত করা হবে না এবং কর্তব্যে অবহেলা প্রমাণিত হলে শাস্তিমূলক ব্যবস্থা নেওয়া হবে।

নির্বাচন কমিশনের নির্দেশ অনুযায়ী মাইক্রো অবজারভারদের মূল দায়িত্ব হল— এনুমারেশন ফর্মে ডিজিটাইজড এন্ট্রি যাচাই, ভোটার তালিকার সঙ্গে জন্ম-মৃত্যু নথির তুলনা, যাঁদের নোটিস পাঠানো হয়েছে তাঁদের জমা দেওয়া নথি পরীক্ষা, দাবিদাওয়া ও আপত্তির ক্ষেত্রে দাখিল হওয়া কাগজপত্র খতিয়ে দেখা এবং শুনানির সময় ইলেক্টরদের সঙ্গে ERO বা AERO-র যৌথ ছবি তুলে তা নির্দিষ্ট সময়ে আপলোড করা। পাশাপাশি তালিকা সংশোধনের সময় কোনও বিচ্যুতি বা অসঙ্গতি ধরা পড়লে তার রিপোর্ট করাও মাইক্রো অবসার্ভারদের দায়িত্ব বলে জানানো হয়েছে।

কিন্তু নির্বাচন কমিশনের পক্ষ থেকে রাজ্যের বিভিন্ন শুনানি কেন্দ্র পরিদর্শনে গিয়ে দেখা গেছে, বহু জায়গায় মাইক্রো অবজারভাররা নির্ধারিত দায়িত্ব ঠিকভাবে পালন করছেন না। এমনকি শুনানিতে আসা ভোটারদের স্বাক্ষরও যথাযথভাবে যাচাই করা হচ্ছে না। এই প্রেক্ষিতে সংশ্লিষ্ট নির্দেশ।

রাজ্যে চলতি SIR প্রক্রিয়া নিয়ে নির্বাচন কমিশনের বিরুদ্ধে ‘হয়রানি’, ‘সংবেদনহীনতা’ এবং ‘রাজনৈতিক পক্ষপাতের’ অভিযোগ তুলে মুখ্যমন্ত্রী মমতা ব্যানার্জী গতকাল ফের মুখ্য নির্বাচন কমিশনার জ্ঞানেশ কুমারকে চিঠি লিখেছেন। ওই চিঠিতে এসআইআর প্রক্রিয়াকে গণতন্ত্র ও সংবিধানের মূল ভিত্তির উপর আঘাত বলে চিঠিতে তিনি অভিযোগ করেছেন।

বেআইনি কয়লা পাচার কাণ্ডের তদন্তে কলকাতায় তল্লাশির সময় কি ঘটেছিল, তা বিস্তারিত জানিয়ে কলকাতার এনফোর্সমেন্ট ডিরেক্টরেট, দিল্লিতে রিপোর্ট জমা দিয়েছে। এই ঘটনায় প্রত্যক্ষদর্শী আধিকারিকদের বয়ান সহ কেন্দ্রীয় বাহিনী ও কলকাতা পুলিশের পাশাপাশি রাজ্য প্রশাসনের ভূমিকার কথা রিপোর্টে উল্লেখ করা হয়েছে।

উল্লেখ্য, গত বৃহস্পতিবার কয়লা পাচার মামলায় পশ্চিমবঙ্গ ও দিল্লির দশটি জায়গায় ইডি অভিযান চালায়। কলকাতায় তল্লাশির সময় মুখ্যমন্ত্রী মমতা ব্যানার্জী নিজের সাংবিধানিক ক্ষমতার অপব্যবহার করে, তাঁদের কাজে বাধা দেন বলে অভিযোগ জানায় ইডি।

আইপ্যাক-এর কর্ণধার প্রতীক জৈনের বাড়ি ও কার্যালয়ে তাদের কাজে বাধাদানের পরিপ্রেক্ষিতে পশ্চিমবঙ্গের মুখ্যমন্ত্রী মমতা ব্যানার্জীর বিরুদ্ধে সুপ্রিম কোর্টে মামলা দায়ের করতে চলেছে ইডি। শনি ও রবি ছুটি থাকায় তারা দ্রুত শুনানির জন্যে অনলাইনে আবেদন জানিয়েছে। অন্যদিকে, রাজ্যের পক্ষ থেকেও সুপ্রিম কোর্টে অনলাইনে ‘ক্যাভিয়েট’ দাখিল করা হয়েছে।

আইপ্যাকের কর্ণধারের বাড়িতে একজন রাজনৈতিক নেত্রী হিসেবে গিয়েছিলেন বলে মুখ্যমন্ত্রী যে দাবি করেছেন বিজেপি তার সমালোচনা করেছে। দলের প্রাক্তন রাজ্য সভাপতি, কেন্দ্রীয় মন্ত্রী সুকান্ত মজুমদার গতসন্ধ্যায় সাংবাদিকদের প্রশ্নের উত্তরে জানিয়েছেন, আইপ্যাকের কর্ণধার কোন রাজনৈতিক দলের সদস্য নয়। তাই সেক্ষেত্রে মুখ্যমন্ত্রী রাজনৈতিক দলের নেত্রী হিসেবে কেন গিয়েছিলেন, শ্রী মজুমদার সে বিষয়ে প্রশ্ন তোলেন। পাশাপাশি রাজনৈতিক দলের নেত্রী হিসেবে সেখানে গেলে মুখ্যমন্ত্রীর সঙ্গে মুখ্য সচিব নন্দিনী চক্রবর্তী ও কয়েকজন পুলিশ আধিকারিক কেন গিয়েছিলেন শ্রী মজুমদার তাও জানতে চান। তিনি বলেন, কয়লা দুর্নীতিতে জড়িতদের আড়াল করতে নথি ছিনিয়ে নিতে গিয়ে মুখ্যমন্ত্রীর যে আতঙ্ক ও অস্থিরতা দেখা গেছে তাতে বিষয়টিতে সন্দেহের অবকাশ রয়েছে।

(বাইট- সুকান্ত)

পশ্চিম মেদিনীপুরের চন্দ্রকোনা রোড এলাকায়, রাজ্যের বিরোধী দলনেতা শুভেন্দু অধিকারীর গাড়িতে হামলার অভিযোগ উঠেছে। ঘটনার প্রতিবাদে এবং অভিযুক্তদের গ্রেপ্তারের দাবিতে তিনি গতকাল গড়বেতা থানার চন্দ্রকোনা বিট হাউস ফাঁড়িতে অবস্থান বিক্ষোভ শুরু করেন। রাতে সাড়ে ১১ টা পর্যন্ত চলে ওই অবস্থান। পরে পুলিশ শুভেন্দুর অভিযোগের প্রেক্ষিতে FIR গ্রহণ করে। তবে 'বিরোধী দলনেতার ওপর প্রাণঘাতী হামলা'-শব্দগুলি FIR-এ রাখা নিয়ে পুলিশের সঙ্গে শুভেন্দু অধিকারীর বেশ কিছুক্ষণ বাকবিতণ্ডা চলে। পরে অবশ্য বিরোধী দলনেতার কথামতোই অভিযোগ গ্রহণ করা হয়।

উল্লেখ্য, পুরুলিয়া থেকে ফেরার পথে গতরাতে চন্দ্রকোনা রোডের সাতবাঁকুড়া গ্রাম পঞ্চায়েত অফিসের কাছে তৃণমূল কংগ্রেসের স্থানীয় কিছু কর্মী-সমর্থক, বিরোধী

দলনেতার গাড়িতে হামলা চালায়। এই অতর্কিত আক্রমণে তাঁর কনভয়ের দুটি গাড়ি ক্ষতিগ্রস্ত হয়েছে বলে অভিযোগ করেন শুভেন্দু।

তীব্র শীতের প্রকোপ উপেক্ষা করেই গঙ্গাসাগর মেলায় আজ ভোর থেকেই শুরু হয়েছে নানা অনুষ্ঠান। গতকাল মেলার আনুষ্ঠানিক উদ্বোধন হয়।

একটি প্রতিবেদন- (ভিসি- গৌতম)

(সাগরতট এলাকায় আয়োজিত সাগর-প্রবচনে ধর্মীয় গুরুরা মানবজীবনে ধর্ম, নৈতিকতা ও সম্প্রীতির মূল বার্তা তুলে ধরছেন। ভোরের কুয়াশা আর কনকনে ঠান্ডার মধ্যেও সেই প্রবচন শুনতে ভিড় জমাচ্ছেন অসংখ্য ভক্ত। পাশাপাশি ইসকনের উদ্যোগে শুরু হয়েছে নগর-সংকীর্তন। ঢাক, কাঁসর আর হরিনামের ধ্বনিতে মুখরিত হয়ে উঠেছে গোটা মেলাপ্রাঙ্গণ। কয়েকশো ভক্ত একসঙ্গে পুরো মেলা পরিক্রমা করছেন, যাঁদের মধ্যে বিদেশি ভক্তদের উপস্থিতিও নজর কাড়ছে।

গতকাল আনুষ্ঠানিকভাবে মেলার উদ্বোধনের মাধ্যমে মকর সংক্রান্তির মাহেন্দ্রক্ষণের কাউন্টডাউন শুরু হয়ে গিয়েছে। ইতমধ্যেই হাজার হাজার পুণ্যার্থী সাগরমেলায় এসে পৌঁছেছেন।

পুণ্যার্থীদের নিরাপত্তা ও সুষ্ঠু ব্যবস্থাপনার জন্য আঁটোসাটো নিরাপত্তা বলয়ে মুড়ে ফেলা হয়েছে গোটা সাগরমেলা এলাকা। আজ সন্ধ্যায় শুরু হবে রঙিন ও বর্ণাঢ্য সাগর-আরতি, যা টানা তিন দিন চলবে।)

বর্ধমানে মকর সংক্রান্তিতে শুরু হচ্ছে ঘুড়ির উৎসব। এই উপলক্ষ্যে বিপজ্জনক চীনা মাঞ্জার বিপদ থেকে সাধারণ মানুষকে সচেতন করতে বর্ধমান শহরের ট্রাফিক পুলিশ বিশেষ উদ্যোগী হয়েছে। বর্ধমানের ট্রাফিক ওসি চিন্ময় বন্দ্যোপাধ্যায়ের উপস্থিতিতে গতকাল কার্জন গেটের সামনে জিটি রোডে, পথচারী ও বাইক আরোহীদের গলায় নেক শিল্ড পড়িয়ে দেয় পুলিশ।

উল্লেখ্য, বেশ কয়েক বছর ধরেই ঘুড়ি ওড়ানোর জন্য দেশি মাঞ্জার জায়গা দখল করে নিয়েছে বিপজ্জনক চীনা মাঞ্জা। ধারালো ও শক্ত এই মাঞ্জা, গলায়, হাতে-পায়ে লেগে পথচারী, বিশেষত বাইক আরোহীরা আহত হন। এমনকি কোথাও কোথাও মৃত্যুর ঘটনাও ঘটেছে।

পুলিশের কাজে বাধা দেওয়া, তাদের নির্দেশ না মানা সহ একাধিক অভিযোগে, আদিবাসী কুড়মি সমাজের প্রায় চারশ নেতা কর্মীর বিরুদ্ধে স্বতঃপ্রণোদিত মামলা দায়ের করলো পুরুলিয়া জেলা পুলিশ।

জানা গেছে, গত শুক্রবার পুরুলিয়া শহরে তারা "ডহরে টুসু" নামে একটি কর্মসূচি পালন করে। তাতে আয়োজকরা নির্দিষ্ট রুট মানেননি বলে অভিযোগ করেন জেলা পুলিশ সুপার বৈভব তেওয়ারি।

যদিও আদিবাসী কুড়মি সমাজের মূল মানতা অজিত প্রসাদ মাহাতো পুলিশের মামলার নিন্দা করে বলেন, তাঁদের সঙ্গে কোনরকম খারাপ আচরণ করা হয়নি। তবুও কেন এই ধরনের মামলা করা হল বোঝা যাচ্ছেনা।

বাংলা মেয়েদের অনূর্ধ্ব ১৫ একদিনের ট্রফি ক্রিকেটের কোয়ার্টার ফাইনালে উঠেছে। ত্রীবন্দমে গতকাল বাংলা ৮ উইকেটে তামিলনাড়ুকে হারিয়ে টানা পাঁচ ম্যাচ জিতে নকআউট পর্বে পৌঁছেছে। এলিট গ্রুপের শীর্ষে থেকে শেষ আটে উঠেছে বাংলা। গতকাল তামিলনাড়ু প্রথমে ব্যাট করতে নেমে ৩৫ ওভারে ৯ উইকেটে ১২১ রান তোলে। বাংলার সালমা খাতুন ৩টি, দেবস্মিতা কালসা ও রাধিকা কুমারী ২টি করে উইকেট নিয়েছে। জবাবে বাংলা ২৮ ওভার ৫ বলে ২ উইকেটে জয়ের লক্ষ্যে পৌঁছে যায়। সাইলা সেনাপতি ৫৯ রানে অপরাজিত থাকেন।

রাজ্যে শীতের প্রকোপ থাকলেও আজ কলকাতায় বেশ কয়েকদিন পর সর্বনিম্ন তাপমাত্রা স্বাভাবিকের উপরে। আলিপুরে আজ সকালে সর্বনিম্ন তাপমাত্রা রেকর্ড করা হয় ১৫ ডিগ্রি সেলসিয়াস, স্বাভাবিকের থেকে যা এক দশমিক দুই ডিগ্রি বেশি। গতকাল সর্বোচ্চ তাপমাত্রা রেকর্ড করা হয়েছিল ২২ ডিগ্রি সেলসিয়াস স্বাভাবিকের থেকে ২.৭ ডিগ্রি

কম। উত্তরবঙ্গের প্রায় প্রতিটি জেলাতেই ঘন কুয়াশা এবং দক্ষিণবঙ্গে আজ সকালের
দিকে বিক্ষিপ্তভাবে কুয়াশা ছিল।
